

Mga Baruganan sa Pagtudlo ug Pagkat-on

PRESIDENTE BOYD K. PACKER

Aking nga Presidente sa Korum sa Napulog Duha ka mga Apostoles

ELDER L. TOM PERRY

Sa Korum sa Napulog Duha ka mga Apostoles



Pagtudlo ug Pagkat-on

Presidente Packer: Ang atong tema mao ang pagtudlo ug pagkat-on sa ebanghelyo ni Jesukristo, sa klasehanan ug sa panimalay. Kitang tanan—mga lider, mga magtutudlo, mga misyonaryo, ug mga ginikanan—adunay tibuok kinabuhi nga hagit sa Ginoo sa pagtudlo ug pagkat-on sa mga doktrina sa ebanghelyo ingon sa gipadayag kini kanato.

Sugdan nato sa mubo nga pakighinabi ni Elder L. Tom Perry ug nako mahitungod sa mga baruganan nga

makaugmad og maayong pagtudlo.

Ang akong assignment mao ang paghatud og pipila ka personal nga mga kasinatian nga nakatudlo kanako pagayo kabahin sa pagtudlo ug pagkat-on. Kon motan-aw ug maminaw kamo pagayo, inyong mamatikdan nga aron mahimong usa ka maayong magtutudlo kinahanglan usab nga mamahimong matugtanon nga estudyante.

Ang among pakighinabi pagasundan ni Elder Jeffrey R. Holland, nga motudlo kanato mahitungod sa pagpangandam sa pagtudlo. Moapil

dayon siya sa usa ka klasehanan sa mga estudyante aron sa pagpakita og ehemplo sa pagtudlo sa klase.

Bisan hain sa Napulog Duha makahimo pagayo sa paghatag niini nga demostrasyon. Ang matag usa adunay lain-laing paagi gikan sa uban. Walay bugtong nga paagi nga mosalir alang sa tanang mga magtutudlo o sitwasyon. Ang Espiritu mahinungdanon sa paggiya kanato sa paggamit sa atong kaugalingong pagpangandam, kasinatian, personalidad, kahibalo, ug pagpamatuod sa bisan unsang sitwasyon sa pagtudlo.

Mga Responsibilidad sa mga Lider

Ang mga lider adunay responsibilidad sa pagtudlo, maanaa man sila sa mga council o mga interbyu o pagsimba. Aduna sab silay responsibilidad sa pagsiguro nga ang pagpalambo sa magtutudlo ug epektibo nga pagkat-on sa ebanghelyo nagpadayon diha sa mga kinabuhi sa mga miyembro.

Niana, ang First Presidency mipagawas og sulat nga pinetsahan og Nobyembre 17, 2006, nagundang sa posisyon sa teacher improvement coordinator sa ward ug sa stake. Naguban sa maong sulat mao ang usa ka lista sa “Mga Responsibilidad sa mga Lider alang sa Pagpauswag sa Magtutudlo.” Masaligon kami nga ang mga baruganan nga gitudlo dinhi niini nga sibya, uban sa mga sugyot ug mga kapanguhaan nga gipahayag sa maong sulat, ang mga lider sa priesthood ug auxiliary magtinambagay sa pagpauswag sa pagtudlo ug pagkat-on sa ebanghelyo. Wala kinahanglana nga magpahigayon og espesyal nga mga miting gawas diha sa inyong mga council ug mga interbyu sa matag karon ug unya sigun sa gikinahanglan.

Kami nagampo nga kini nga sibya makatabang kaninyo nga mamahimong mas maayo nga mga magtutudlo



Ang mga pasundayag gikan niining tibuok kalibutan nga miting sa pagbansay sa mga pangulo makatabang kanimo nga molambo isip usa ka magtutudlo ug estudyante. Aron maila ug magamit ang mga ideya dinhi niini nga mga pasundayag, basaha ang mga kasayuran nga anaa sa bughaw [yellow] nga mga kahon nga gibutang duol sa sinugdanan sa kada pasundayag. Mahimo sab nimong markahan ang mga kasulatan ug ang mahinungdanong mga pulong sa pasundayag ug mosulat sa mga impresyon nga imong madawat.

Basaha ang pangbukas nga pakigpulong ni Presidente Packer. Ilha ang mga ideya nga makatabang kanimo nga mamahimong mas maayo nga magtutdlo ug estudyante.

Pamalandongi ang mosunod nga pangu-tana, ug isulat ang mga ideya ug mga impresyon nga moabot kanimo: Unsa may angay nakong buhaton aron masiguro nga anaa kanako ang Espiritu sa atong pagtudlo sa panimalay ug sa simbahan?

Para nimo unsa kaha ang nakatabang nga nakapahimo ni Presidente Packer nga usa ka epektibo nga estudyante?



ug mga estudyante sa ebanghelyo ni Jesukristo.

Andam nga Makat-on

Elder Perry: President, misulat ka og libro nga *Teach Ye Diligently*. Ang kada posisyon sa Simbahan nagkinahanglan og epektibo nga magtutudlo. Mao kini ang atong pinaka importante nga calling. Mahimo bang hisgutan nato kadiyot ang kabahin sa pagtudlo sa makugihong paagi isip usa ka kinahanglanon sa atong daghang mga calling sa Simbahan?

President Packer: Gitudlo ko nga seminary supervisor, ug wala akoy nahibaloan niini. Kaniadto gitudlo ko, nagtrabaho, ug gisweldohan ingnon ta sa paglibut sa Simbahan aron sultihan ang mga magtutudlo sa seminary unsaon pagtudlo ug unsay ilang sayop. Makauulaw kaayo kadto, kay mosulod ko sa usa ka klase ug makita ang mga magtutudlo nga adunay gihimo ug kinahanglan korihian sila nga ako nasayud nga ako pud mohimo man niana, ug aduna ko’y nakat-onan kabahin niini.

Si Elder Harold B. Lee ug si Elder Marion G. Romney kanunay gayud nga magtudlo, ug sila mosiguro gayud nga mosulti o motudlo kanako og mga butang. Para nako nganong

ila kadtong gihimo—dili ko sigurado nga nakita ko nila dinhi niining posisyon o calling—mao nga aduna koy usa ka hiyas: gusto kong makat-on, ug dili ko magpanuko niini. Ug kon dili ka magpanuko niini, ug kon gusto ka nga makat-on, ang Ginoo magsige’g tudlo nimo, usahay mga butang nga wala ka magdahum nga gusto nimong masayran.

Kining duha ka mga banggiitang mga magtutudlo motudlo kanako. Kon magkita kami ni Brother Romney, usahay moingon siya nako, “Kid, naa koy isulti nimo.” Nasayud ko nga tudloan gyud ko. Sultihan ko niya nga naghimo ko og butang nga dili angay nakong buhaton, ug magpasalamat gayud ako kaniya.

Akong nakat-onan kaniadto nga bilihon ang pagpamati sa kasinatian sa mas tigulang nga mga tawo. Aduna koy stake president kaniadto nga miingon, “Maningkamot gyud ko nga maanaa kauban sa banggiitang mga tawo.” Anaa siya sa gamay nga lungsod sa Idaho, apan siya miingon, “Kon dunay *lecturer* nga moanhi o butang nga espesyal, maningkamot gayud ko nga makaadto, tungod kay makakat-on man ko.”

Daan na akong hilig nga makigubanan sa mas tigulang nga mga tawo

(karon usa na pud ako). Akong nahinumduman sa Korum sa Napulog Duha, si LeGrand Richards hinay molakaw kaysa ubang mga Kaigsoonan, ug mohulat gyud ko ug moabli sa pultahan niya ug mouban sa paglakaw balik sa bilding uban niya. Usa ka adlaw usa sa mga Kaigsoonan miingon, “Oh, kabuotan gud nimo sa paghikutar kang Brother Richards.” Ug sa akong hunahuna, “Wala lang mo kahibalo sa akong motibo”—nga samtang kami manglakaw, maminaw ra gayud ko niya. Nasayud ko nga makahinumdom siya ni Wilford Woodruff, ug moistorya siya niini. Ang binagsa nga pagtudlo gamhanan kaayo. Kasagaran ang binagsa nga pagtudlo maoy mahitabo kon ikaw korihian.

Laing baruganan sa pagtudlo mao ang pagbangon og sayo (tan-awa sa D&P 88:124)—apan ang sayon nga bahin niana, o ang lisud nga bahin, mao ang pagpahulay sa higdaanan—ug dayon mamalandong inig ka buntag diin klaro ang imong panghunahuna. Diha ang mga ideya moabot sa pagtudlo.

Wala ko mahibalo kon kapila ako adunay assignment ug wala gayud ako masayud kon unsay buhaton. Kagahapon niana diha ko sa miting sa mga General Authorities. Nasayud ko

nga ako ang mo-istorya og una, ug naghunahuna ko, “Unsa may akong isulti?” Ug masaligon ko nga kini moabot ra, ug miabot gayud.

Paggamit sa mga Kasulatan

Elder Perry: Unsa ang importansya sa paggamit sa mga kasulatan sa imong pagtudlo?

President Packer: Kanunay gayud ako magsalig sa mga kasulatan. Ang pinakamaayong ehemplo sa pagtudlo ug unsaon pagtudlo, ang pinakamaayong modelo sa mga paagi sa pagtudlo, gawas sa hilisgutan, nga mao ang ebanghelyo, mao ang Ginoo ug ang Iyang pagtulun-an. Mao nang dili ko gusto moadto sa pulpito o mobarug sa atubangan sa klase nga walay gikuptan nga mga kasulatan. Ania akong gikuptan karon.

Elder Perry: President, imong gidala-dala kana nga mga kasulatan. Sa matag higayon nga mouban ko nimo, anaa kana nga mga kasulatan. Imo kaming giistoryahan sa usa ka higayon nga kini sila nahumod sa tubig, ug nakatabang hinoon kini tungod kay sa-yon na hinoong paklion.

President Packer: Ah, samtang nagtuon ko sa gawas sa tugkaran ug gitawag ko ug gibiyaan ang kasulatan nga bukas diha sa gamay nga lamesa—nakalimtan nako kini, mao man gyud nang mga tigulang—ug ang mga sprinklers gipaagas. Paggawas nako pagkabuntag ug naghunahuna, “Ayay, ang akong scriptures nga gimarkahan sulod sa 50 ka tuig wala na.” Akong nakita nga igo lang kini mipaluag sa mga pahina. Siguro kon duna koy bag-ong scriptures, ako kining paulanan sa dili ko pa kini gamiton.

Elder Perry: Ang mga tawo kanunayng maghisgut kabahin sa mga kasulatan ug, uban kanila, kon unsa ka lisud kini sabton. Unsaon man paghimo sa mga kasulatan nga

buhi diha sa imong pagtudlo?

President Packer: Padayon sa pagbasa. Kahinumdom ko nga mideterminar nga mobasa ko sa Basahon ni Mormon. Ulitawo pa ko kaniadto. Giabli ko kini ug mibasa, “Ako, si Nephi, natawo sa mga matarung nga ginikanan” (1 Nephi 1:1). Ug mipadayon ko sa mga chapter, ug nakat-on ko og daghang mga butang. Nindot kaayo, ug masubay ko kini hangtud naabot ko sa mga chapter sa Isaiah ug sa pinulongan sa propeta sa Daang Tugon. Mao nga human sa pipila ka bulan nakadesidir ko nga mobasa pag-usab sa Basahon ni Mormon. Mibasa ko, “Ako, si Nephi, natawo sa matarung nga ginikanan,” apan sa kada buhat nako niana maungot gyud ko sa nianang mga chapter sa Isaiah, ug mahibulong nganong anaa ni sila dinhi.

Sa katapusan midesidir ko nga basahon gayud kini. Mao nga sa tinedyer pa ko, igo ra nakong tan-awon ang mga pulong. Wala ko makasabot, apan mosubay ko pagbasa ug mopadayon. Inig labay nimo sa Alma, mo- hanoy na ka sa pagbasa niini.

Mao nga kinahanglang determinado ka sa pagbasa niini, ug dili lang kay motikdol-tikdol lang, apan basahon kini sa sinugdanan ngadto sa katapusan—ang Basahon ni Mormon, ang Bag-ong Tugon, ang Doktrina ug mga Pakigsaad, ang Perlas nga Labing

Bililhon. Sa katuigan gipaniguro nako nga mobasa sa mga kasulatan kada



summer diin aduna kami dyutayng pahulay aron sa pagbag-o pag-usab sa anaa sa hunahuna.

Pag-ampo alang sa Gasa sa Pagtudlo

Elder Perry: Unsa nga tambag ang imong ihatag sa bag-ong mga miyembro sa dili pa sila makadawat sa una nilang *calling* isip magtudlo?

President Packer: Sultihan ko sila nga kaya nila. Ang tanan makatudlo. Tambagan ko sila sa pag-ampo alang sa gasa sa pagtudlo. Ang basahon ni Mormon naghigot kabahin sa mga gasa ug naglatid sa pipila ka mga gasa, lakip niini mao ang pagtudlo sa ebanghelyo pinaagi sa Espiritu (tan-awa sa Moroni 10:8–10). Dihang nabasahan ko kana dugay na, abi nako, “Mao kana ang gasa nga gusto nako, nga makatudlo pinaagi sa Espiritu.” Nakita nako sa mga kasulatan nga kinahanglang pangayoon mo kini—pangayo ug ikaw makadawat—mao nga mosulti ko nila sa pagpadayon sa pagpangayo ug pangita, “ug ikaw makakita” (tan-awa sa Mateo 7:7; 3 Nephi 27:29) ug nga ang gasa kinahanglan maangkon, ug moabot ra kini.

Pagpangita sa Espiritu

Elder Perry: Unsa may angay buhaton sa mga magtudlo aron masiguro nga anaa ang Espiritu sa ilang pagtudlo?

President Packer: Kinahanglang magpakabuhi sa takus nga paagi, ug mangayo kag panabang. Makapangayo ka og tabang kon kamo mga ginikanan. Ug unya kinahanglan mong mohupot sa mga sugo ug mag-ampo kanunay, walay hunong alang sa abilidad ug sa inspirasyon nga masayud kon unsay buhaton ug kanus-a buhaton. Ang Ginoo dili mopakyas kanimo: “Dili ko kamo pagabiyaan nga daw

mga ilo: Ako mobalik ra kaninyo” (Juan 14:18). “Bisan unsay . . . imong pangayoon diha sa hugot nga pag-tuo, magtuo nga ikaw makadawat,” ikaw makadawat niini (Enos 1:15). Unya usa sa mga kasulatan midugang og gamay—*kon* kini maayo kanimo (tan-awa sa Moroni 7:26). Ang ebanghelyo praktikal kaayo.

Mahimong usa ka ka tigulang nga tawo nga naghunahuna nga ang imong pagpangalagad human na, mahimong usa ka ka batan-on nga nahadlok sa bisan unsa, o usa ka inahan nga bisi kaayo sa mga anak, o usa ka amahan nga daghan kaayong gihunahuna, apan ikaw mahimong makatudlo, ug makaampo ka, ug ikaw mahimong magiyahan. Ug mamaayo ra ka nga magtutudlo. Panalanganin ka sa Ginoo—makasaad ako kaninyo niana.

Sa dihang ang Ginoo nagtudlo, kanunay gayud Siya nga mogamit sa mga butang nga nahibaloan sa mga tawo. Sama pananglit, “Ang gingharian sa langit sama sa usa ka pukot” (Mateo 13:47)—dili gayud kini usa ka pukot, apan sama ra kini niini; ug dayon Iyang gipasabot kon ngano. Ug “ang gingharian sa langit sama sa usa ka magpapatigayon, nga nangitag mga hamiling mutya” (Mateo 13:45). Dihang gihatag Niya ang sambingay sa magpupugas (tan-awa sa Mateo 13:3–8), sila makasabot niana, ug dili kay posible lamang apan katuhoan, human Siya mihatag sa sambingay sa magpupugas ug naghisgot kabahin sa mga binhi nga gisabod diha sa gahi nga yuta ug maayo nga yuta, nga human sa usa ka bulan usa niadtong nakadungog ug atoa nanamun, makakita sa mga binhi diha sa iyang mga kamot, makahanduraw sa maong leksyon.

Kon mogamit ka og mga sambingay ug mga istorya ug mga paglarawan,

magpabilin kini bisan migawas na ang mga estudyante sa klase. Ang Iyang paagi simple ra gayud kaayo. Siya usahay estrikto kaayo, apan sa kanunay ang Iyang mga pagtudlo masabtan gayud nila.

Ang pagtudlo sagrado nga *calling*, usa ka balaan nga *calling*. Ang butang nga akong isulti sa mga magtutudlo mao nga dili gayud sila magtudlo nga mag-inusara. Wala kinahanglana nga mag-inusara ra sila. Ang Ginoo misaad niana diha sa mga kasulatan. Si Alma miingon ang Ginoo mihatag sa tanang kanasuran, sa matag pinulongan, og mga magtutudlo (tan-awa sa Alma 29:8), ug ang Ginoo miingon, “Pagtudlo kamo nga makugihon ug ang akong grasya [mo]uban kaninyo” (D&P 88:78).

Dili ko kajibalo motudlo sa ebanghelyo kon wala ang kanunay nga pag-ampo. Mahimo nimong isulti ang pag-ampo, apan mahimo sab nimong mahunahuna ang usa ka pag-ampo. Daghang higayon nga nagtudlo ko sa usa ka grupo o klase nag-ampo ko sa sulod nako, “Unsaon nako nga sila makasabot?” Ug wala ako masayud unsaon

gawas sa pag-angkon nianang gahum sa pag-ampo.

Ang Responsibilidad sa Pagtudlo

Elder Perry: Ang pagtudlo maoy anaa sa tunga-tunga sa tanang kalihokan sa Simbahan. Kinsa ang responsable sa pagpangandam sa ilang kaugalingon sa pagtudlo?

President Packer: Ang tanan magtutudlo—ang lider usa ka magtutudlo; ang tigsunod usa ka magtutudlo; ang counselor usa ka magtutudlo; ang mga ginikanan nga magtutudlo. Busa kita adunay responsibilidad sa pagtudlo, sa pagkat-on sa mga baruganan sa pagtudlo. Ang Ginoo mipahimutang sa Iyang Simbahan aron mahimo nato ang tanan sa Simbahan. Adunay giingon sa Doktrina ug mga Pakigsaad nga “ang matag tawo unta mamulong sa ngalan sa Dios ang Ginoo, . . . ang Manluluwas sa kalibutan” (D&P 1:20). Pagkabulahan nato nga aduna kitay dili binayran nga priesthood, ingon sa kini gitawag, aron ang tanang kaigsoonan makahupot sa priesthood. Ang tanang mga sisters mahimong mahatagan og mga *calling* sa Simbahan, ug kitang tanan mahimong mga ginikanan. Busa, ang pagtudlo maoy sentro sa tanan natong gipanghimo.

Elder Perry: Naghisgot ka og pagtudlo sulod sa panimalay. Unsay kalainan sa pagtudlo sulod sa Simbahan ug pagtudlo sulod sa panimalay? Aduna bay dakong kalainan?

President Packer: Sa panimalay mas suod ug mas maayo ug mas sayon ug dili kaayo pormal, ug ang mga ginikanan motudlo pinaagi sa ehemplo. Ang mga ginikanan makatudlo og mga butang nga sakit gamay sa mga bata kon mangutana sila “ngano,” ug ang matubag ra gayud sa mga ginikanan mao “tungod kay”—





Kinahanglan kang magpakabuhi sa takus nga paagi, ug mangayo ka og panabang. Makapangayo ka og tabang kon kamo mga ginikanan. Ug unya kinahanglan mong mohupot sa mga sugo ug mag-ampo kanunay, walay hunong alang sa abilidad ug sa inspirasyon nga masayud kon unsay buhaton ug kanus-a buhaton.

tungod kay wala man sila masayud ngano, ila lang nahibaloan nga dili kini maayong buhaton, ug sila motudlo kanila sa pagkamasulundon aron sila makahibalo ug makasabot. Ug sa panimalay anaa kanang gamhanang bugkos sa gugma tali sa ginikanan ug anak nga dili gayud ikaw moundang hangtud nga sila natudloan.

Pagtudlo pinaagi sa Espiritu

Elder Perry: President, unsaon nimo aron ang Espiritu nga anaa sa classroom gikan sa magtutudlo ngadto sa mga estudyante sa paagi nga kini mahimong makahuluganon nga kasinatian kanila?

President Packer: Una, kinahanglan sila nga masayud nga gihigugma nimo sila, nga gusto kang motudlo nila. Unya kinahanglan kang makig-istorya kanila sa ilang lebel. Dili kita mahimong makig-istorya kanila labaw sa ilang ang-ang sa pagsabot bisan sa ebanghelyo—kabahin sa mga butang nga dili nila masabtan. Dili kana mao ang gihimo sa Ginoo. Ang Ginoo milakaw uban kanila ug nakig-istorya kanila sa inadlaw-adlawng kinabuhi, ug ang Iyang mga pagtulun-an anaa kanunay niana nga lebel.

Kon aduna kay itudlo, gusto gayud

sila nga makat-on. Bisang mga tin-edyer—ilabi na ang mga tin-edyer—gustong makat-on. Giuhaw sila niini.

Daghang mga magtutudlo naghunahuna nga kinahanglan sila nga mandam mismong kada pulong. Oo ug dili. Kana nga pagpangandam naglakip sa pagpahiangay sa presentasyon aron mahiapil ang mga estudyante ug nga sila mangutana ug madala sila ngadto sa leksyon. Kinahanglan ka nga mohatag og luna alang sa inspirasyon.

Ang Espiritu Santo moaghat sa inyong panumduman. Kon aduna tay gilisdan sa pagtudlo, ug maghunahuna kita kon si kinsa kita ug unsay atong gibuhay, anaa kanunay ang dyutayng kasinatian nato o mga lugar nga atong naadtoan o butang nga atong nakita nga magamit nato sa leksyon. Ug ang mga kasulatan kabahin nianang tanan. Dili kay kini sila usa ka libro lamang nga imong basahon sa matag karon ug unya aron masabtan ang mga patakaran sa Simbahan.

Tipik sa pagtudlo nga gihimo sa Simbahan gihimo sa estrikto nga paagi, mao ang lektyur. Dili kaayo ‘ta ganahan og lektyur sulod sa mga classroom. Gibuhay nato kini sa sacrament meeting ug sa mga conference,

apan ang pagtudlo mahimong magtubag-tubag aron makapangutana kamo. Sayon ka nga makadasig og mga pangutana sulod sa klase.

Pananglit nagtudlo ka kabahin sa Pagkamartir ni Propeta Joseph Smith. Usa ka ka Church history teacher, ug natun-an nimo kining tanan, ug ikaw nahibalo nga sa Hunyo 27, 1844, sa alas 5:00 sa hapon sa Bilanggoan sa Carthage gipusil ang Propeta. Kon pangutan-on nimo sila unsang orasa ug diin ug uban pa ang Propeta gipusil, walay makatubag kanila. Ikaw wala mahibalo sa wala pa ka mobasa sa manwal. Apan makasulti ka, “Unsay hinungdan nga naingon siya niini? Unsa sa inyong hunahuna ang nakaingon?” Sa higayon nga mangutana ka, “Unsa sa inyong hunahuna?” aduna silay matubag. Makatampo sila; bisan ang mga estudyante nga pinakamaula-won aduna gayuy masulti. Busa adunay paagi sa pagtagad sa mga pangutana ug sa pagdumala sa klase. Tubag sa mga pangutana. Pangutana og mga pangutana sa klase.

Dili ka makahatag og butang nga wala nimo kaysa makabalik sa usa ka lugar nga wala pa nimo maadto. Mao nga kinahanglan maanaa kanimo ang Espiritu. ■